

Na sjednici Odbora direktora održanoj 28.04.2021. godine usvojeni su:

OPŠTI USLOVI ZA OSIGURANJE IMOVINE

UVODNE ODREDBE

- (1) Ovi Uslovi primjenjuju se na osiguranje imovine, izuzev na one vrste osiguranja imovine koje izričito isključuju primjenu ovih Uslova.
- (2) U ovim Uslovima pojedini izrazi znače:
 - **Osiguravač – Sava osiguranje AD,**
 - **Ugovarač osiguranja** – lice koje sa osiguravačem zaključuje ugovor o osiguranju,
 - **Osiguranik** – lice čiji je interes osiguran,
 - **Premija** – iznos koji se plaća za osiguranje po ugovoru o osiguranju,
 - **Suma osiguranja** – iznos na koji je imovina odnosno imovinski interes osiguran, ako iz sadržaja ugovora o osiguranju ne proizilazi nešto drugo,
 - **List pokrića** – potvrda koja privremeno zamjenjuje polis, u
 - **Polisa** – isprava o osiguranju.

I OPŠTE ODREDBE

Zaključivanje ugovora o osiguranju

Član 1.

- (1) Ugovor o osiguranju imovine može zaključiti svako lice koje ima interes da se ne dogodi osigurani slučaj, jer bi pretrpjelo neki materijalni gubitak.
- (2) Ugovor o osiguranju zaključuje se na osnovu usmene ili pisane ponude, a zaključen je kada ugovarači potpišu polis osiguranja ili list pokrića. Usmena ponuda učinjena osiguravaču za zaključivanje ugovora o osiguranju ne obavezuje ni ponuđača ni osiguravača. Pisana ponuda učinjena osiguravaču za zaključenje ugovora o osiguranju vezuje ponuđača, ako on nije odredio kraći rok, za vrijeme od osam dana kada je ponuda prispjela osiguravaču.

Ako osiguravač u tom roku ne odbije ponudu koja ne odstupa od uslova pod kojima on vrši predloženo osiguranje smatraće se da je prihvatio ponudu i da je ugovor zaključen. U tom slučaju, ugovor se smatra zaključenim kada je ponuda prispjela osiguravaču.

Ako osiguravač povodom primjene ponude zatraži neku dopunu ili izmjenju, kao dan prijema ponude smatraće se dan kada osiguravač primi traženu dopunu ili izmjenju, odnosno kad bude obaviješten o prihvatanju njihovih uslova.

- (3) Odredbe stava (2) ovog člana primjenjuju se i kada se vrši izmjena postojećeg ugovora o osiguranju.
- (4) Izuzetno od stava (2) ovog člana, ugovor o osiguranju se može zaključiti i kada ugovarač osiguranja ili drugo lice koje ima pravni interes, uplati iznos ukupno obračunate premije osiguranja ili iznos tačno određenog dijela ukupno obračunate premije osiguranja, kako je to navedeno na pisanoj ponudi osiguravača i u roku koji je naveden na toj ponudi. Smatra se da je ukupno obračunata premija osiguranja ili iznos tačno određenog dijela ukupno obračunate premije osiguranja plaćen dana kada je iznos uplate uplaćen na računu osiguravača. Navedena pisana ponuda pored iznosa ukupno obračunate premije osiguranja ili njenog dijela i roka uplate, mora da sadrži i druge bitne elemente ugovora o osiguranju i to: datum početka i isteka osiguranja, predmet osiguranja, osigurane rizike, sume osiguranja ili limite pokrića, franšizu i sl. Početak osiguranja u ovom slučaju ne može biti prije dana plaćanja ukupno obračunate premije osiguranja ili iznosa tačno određenog dijela ukupno obračunate premije osiguranja. Uz navedenu pisanu ponudu osiguravač je u obavezi da dostavi i odgovarajuće uslove osiguranja. Uplata iznosa ukupno obračunate premije osiguranja ili iznosa tačno

određenog dijela ukupno obračunate premije osiguranja, a sve to u roku kako je to navedeno na pisanoj ponudi osiguravača, predstavlja odložni uslov od koga zavisi nastanak dejstva ugovora o osiguranju. Smatraće se da ugovor o osiguranju nije zaključen ako ugovarač osiguranja ili drugo lice koje ima pravni interes:

- 1) ne uplati iznos ukupno obračunate premije osiguranja ili njenog dijela navedenog u pisanoj ponudi u roku određenom u pisanoj ponudi;
- 2) nakon isteka roka određenog u pisanoj ponudi, uplati iznos ukupno obračunate premije osiguranja ili njenog dijela navedenog u pisanoj ponudi;
- 3) uplati niži iznos od iznosa ukupno obračunate premije osiguranja ili njenog tačno određenog dijela navedenog na pisanoj ponudi, u roku navedenom u pisanoj ponudi ili nakon isteka tog roka.

U slučajevima iz tačke 2) i 3) ovog stava, Osiguravač će izvršiti povrat uplaćenog iznosa na ime premije osiguranja, ugovaraču osiguranja odnosno licu koje je izvršilo uplatu.

U slučaju zaključenja ugovora o osiguranju na način definisan ovim stavom, osiguravač će ugovaraču osiguranja izdati potvrdu o zaključenom osiguranju u skladu sa odgovarajućim uslovima, na kojoj će biti navedeni svi bitni elementi ugovora o osiguranju iz pisane ponude, ili na poseban zahtjev ugovarača osiguranja - polisu osiguranja.

- (5) Ukoliko se izričito ugovori na polisi ili listu pokrića, ugovor o osiguranju se smatra zaključenim ako ugovarač osiguranja ili drugo lice koje ima pravni interes uplati iznos ukupno obračunate premije osiguranja u roku navedenom na polisi ili listu pokrića. U ovom slučaju, datum početka osiguranja može biti samo posle isteka roka za plaćanje ukupno obračunate premije koji je naveden na polisi ili listu pokrića. Smatra se da je ukupna premija osiguranja plaćena dana kada je iznos uplate evidentiran na računu osiguravača. Uplata iznosa ukupno obračunate premije osiguranja u roku kako je to navedeno na polisi ili listu pokrića predstavlja odložni uslov od koga zavisi nastanak dejstva ugovora o osiguranju. Smatraće se da ugovor o osiguranju nije zaključen ako ugovarač osiguranja ili drugo lice koje ima pravni interes:

- 1) ne uplati iznos ukupno obračunate premije osiguranja navedene u polisi osiguranja ili listu pokrića u roku određenom u polisi osiguranja ili listu pokrića;
- 2) nakon isteka roka određenog u polisi osiguranja ili listu pokrića uplati iznos ukupno obračunate premije osiguranja;
- 3) uplati niži iznos od iznosa ukupno obračunate premije osiguranja navedene na polisi ili listu pokrića, u roku navedenom na polisi osiguranja ili listu pokrića ili nakon isteka tog roka.

U slučajevima iz tačke 2) i 3) ovog stava, osiguravač će izvršiti povrat uplaćenog iznosa na ime premije osiguranja ugovaraču osiguranja ili licu koje je izvršilo uplatu.

Polisa i list pokrića

Član 2.

- (1) U polisi osiguranja moraju biti navedeni: ugovorne strane, osigurana stvar, rizik obuhvaćen osiguranjem, trajanje osiguranja i period pokrića, suma osiguranja ili da je osiguranje neograničeno, premija ili doprinos, datum izdavanja polise i potpisi ugovornih strana.
- (2) Polisa osiguranja može biti privremeno zamijenjena listom pokrića u koji se unose bitni elementi ugovora. List pokrića se izdaje sa trajanjem od najduže šest mjeseci.
- (3) Osiguravač je dužan da upozori ugovarača osiguranja da su opšti i posebni uslovi osiguranja sastavni dio ugovora i da mu preda njihov tekst, ako ti uslovi nijesu štampani na samoj polisi.
- (4) Izvršenje obaveza iz prethodnog stava mora biti konstatovano na polisi.
- (5) U slučaju neslaganja neke odredbe opštih ili posebnih uslova i neke odredbe polise primijeniće se odredba polise, a u slučaju neslaganja neke štampane odredbe polise i neke njene rukopisne odredbe, primijeniće se ova poslednja.
- (6) Prema sporazumu ugovarača, polisa može glasiti na određeno lice po naredbi ili na donosioca.

Zaključivanje ugovora u ime drugog bez ovlašćenja

Član 3.

- (1) Kad zainteresovano lice zaključi ugovor o osiguranju u ime drugog, bez njegovog ovlašćenja, odgovara osiguravaču za obaveze iz

ugovora sve dok ga onaj u čije je ime ugovor zaključen ne odobri.

- (2) Zainteresovani može odbiti ugovor i pošto se dogodio osigurani slučaj.
- (3) Ako je odobrenje odbijeno, ugovarač osiguranja dužuje premiju za period osiguranja u kome je osiguravač obaviješten o odbijanju odobrenja.
- (4) Za obaveze iz osiguranja neće odgovarati poslovođa bez naloga koji je obavijestio osiguravača da istupa bez ovlašćenja u ime i za račun drugog.

Osiguranje za tuđ račun ili za račun koga se tiče

Član 4.

- (1) U slučaju osiguranja za tuđ račun ili za račun koga se tiče, obaveze plaćanja premije i ostale obaveze iz ugovora dužan je da izvršava ugovarač osiguranja, ali on ne može vršiti prava iz osiguranja, čak i kada drži polis, bez pristanka lica čiji je interes osiguran i kome ona pripadaju.
- (2) Ugovarač osiguranja nije dužan da zainteresovanom licu preda polis dok mu ne budu nadoknađene premije koje je isplatio osiguravaču, kao i troškovi ugovora.
- (3) Ugovarač osiguranja ima pravo prvenstvene naplate ovih potraživanja iz dugovane naknade, kao i pravo da zahtijeva njihovu isplatu neposredno od osiguravača.
- (4) Osiguravač može istaći svakom korisniku osiguranja za tuđ račun sve prigovore koje po osnovu ugovora ima prema ugovaraču osiguranja.

Suma osiguranja

Član 5.

- (1) Ugovor o osiguranju može se zaključiti:
 - 1) Na ugovorenu vrijednost koju odredi ugovarač osiguranja, u smislu posebnih uslova za osiguranje osnovnih sredstava i sredstava zajedničke potrošnje od opasnosti požara i nekih drugih opasnosti, mašina od loma i nekih drugih opasnosti, zaliha na flotantnoj osnovi od opasnosti požara i nekih drugih opasnosti i uslova za kombinovano osiguranje elektronskih računara, procesora i sličnih uređaja.
 - 2) Na sumu osiguranja koju odredi ugovarač osiguranja.

- 3) Na svakovremenu stvarnu vrijednost, bez oznake sume osiguranja u ugovoru o osiguranju.

- 4) Na novu vrijednost, u skladu sa posebnim uslovima osiguranja kojima je predviđeno osiguranje određenih stvari na novu vrijednost.

- 5) Na sumu osiguranja, utvrđenu zakonom ili drugim propisima donijetim na osnovu zakona.

- (2) U slučaju predviđenim tarifom premija, suma osiguranja može se odrediti sporazumno između ugovarača osiguranja i osiguravača, u visini iznosa moguće štete, odnosno troškova (osiguranje na „prvi rizik“).

- (3) Ako je neki ugovor zaključen bez oznake sume osiguranja ili uz neograničeno pokriće, smatraće se kao ugovor zaključen na svakovremeno stvarnu ili na novu vrijednost, odnosno na vrijednost imovinskog interesa u skladu sa sadržinom ugovora.

Trajanje ugovora o osiguranju

Član 6.

- (1) Ugovor o osiguranju može se zaključiti:
 - 1) sa određenim rokom trajanja,
 - 2) sa neodređenim rokom trajanja, kad se nastavlja iz godine u godinu.

Osigurani slučaj

Član 7.

- (1) Događaj s obzirom na koji se zaključuje osiguranje (osigurani slučaj) mora biti budući, neizvjestan i nezavisan od isključive volje ugovarača osiguranja.

- (2) Smatra se da je u osiguranju stvari nastao osigurani slučaj onog trenutka kad je jedna od osiguranih opasnosti iznenada i neočekivano počela da se ostvaruje na osiguranoj stvari i da je oštećuje.

- (3) Ugovor o osiguranju je ništav ako je u času njegovog zaključenja već nastao osigurani slučaj ili je bio u nastupanju, odnosno bilo je izvjesno da će nastupiti ili je već tada bila prestala mogućnost da on nastane.

- (4) Kada je ugovoreno da će osiguranjem biti obuhvaćen određeni period koji prethodi zaključenju ugovora, ugovor će biti ništav samo ako je u času njegovog zaključenja zainteresovanoj strani bilo poznato da se

osigurani slučaj već dogodio, odnosno da je već tada prestala mogućnost da se on dogodi.

Pravna situacija posle nastanka osiguranog slučaja

Član 8.

- (1) Ako se u toku istog perioda osiguranja dogodi više osiguranih slučajeva jedan za drugim, naknada iz osiguranja za svaki od njih određuje se i isplaćuje u potpunosti s obzirom na cijelu sumu osiguranja, bez njenog umanjenja za iznos isplaćenih naknada u tom periodu.
- (2) U slučaju uništenja stvari (totalna šteta) ili kada se stvari po ugovoru o osiguranju smatraju uništenim, za uništenu stvar osiguranje prestaje.
- (3) Kod osiguranja od onih rizika koji se osiguravaju na sumu osiguranja na „prvi rizik“ krajnju obavezu osiguravača u toku jednogodišnjeg perioda osiguranja za ukupne štete na stvarima osiguranim na „prvi rizik“ čini dvostruki iznos ugovorene sume osiguranja. Posle iscrpljenja dvostrukog iznosa sume osiguranja po osnovu tekućih šteta (jedne štete ili više šteta u više štetnih događaja), osiguranik može obnoviti ugovor o osiguranju za preostali period tako što će platiti premiju osiguranja po principu „pro rata temporis“ do isteka osiguranja po osnovnom ugovoru. Tada je krajnja obaveza osiguravača, za preostali period, za ukupne štete na stvarima osiguranim na „prvi rizik“ suma osiguranja na „prvi rizik“.

Način obavještanja

Član 9.

- (1) Sva obavještenja i prijave koje je ugovarač osiguranja dužan da učini, u smislu odredaba ovih Uslova, obavezno treba potvrditi pisanim putem ako su učinjene usmeno, telefonom ili na neki drugi način.
- (2) Kao dan prijema obavještenja odnosno prijave smatra se dan kada je primljeno obavještenje, odnosno prijava. Ako se obavještenje, odnosno prijava šalje preporučeno, kao dan prijema smatra se dan predaje pošti.
- (3) Sporazumi koji se odnose na sadržaj ugovora važe samo ako su zaključeni pisanim putem.

Promjena podataka

Član 10.

- (1) Ugovarač osiguranja odnosno osiguranik je dužan obavijestiti osiguravača o promjeni svog imena ili adrese odnosno naziva firme ili sjedišta, promjeni transakcionog računa, telefonskog broja za kontakt, e-mail adrese u roku od 15 dana od dana promjene.
- (2) Ako je ugovarač osiguranja ili osiguranik promijenio adresu odnosno sjedište ili svoje ime odnosno naziv firme, a o tome nije obavijestio osiguravača, dovoljno je da osiguravač šalje obavještenje ugovaraču osiguranja odnosno osiguraniku na adresu njegovog posljednjeg poznatog prebivališta ili sjedišta ili da ga adresira na posljednje poznato ime odnosno naziv firme. Obavještenje postaje punovažno dana kada bi, prema redovnom toku stvari, postalo validno da nije bilo promjena iz prethodnog stava.

Zaštita ličnih podataka

Član 10a.

- (1) Ugovarač osiguranja odnosno osiguranik svojim potpisom na polisi ovlašćuju osiguravača da prikuplja, obrađuje, čuva, prenosi i koristi lične podatke neophodne za zaključenje ugovora o osiguranju u skladu sa pozitivnim propisima koji regulišu oblast zaštite podataka o ličnosti.
- (2) Osiguravač se obavezuje da podatke iz stava (1) ovog člana čuva kao poslovnu tajnu, u skladu sa pozitivnim propisima i internim aktima osiguravača.

Izmjene uslova osiguranja i tarifa premija

Član 11.

- (1) Ako osiguravač izmijeni ove Uslove odnosno Tarifu premija po kojoj je obračunata premija osiguranja u ugovoru o osiguranju (polisi) zaključenom u skladu sa ovim Uslovima, dužan je da o tome obavijesti ugovarača osiguranja pisanim putem ili na drugi pogodan način.
- (2) Ako ugovarač osiguranja ugovor o osiguranju (polisu) koji je zaključen sa višegodišnjim rokom trajanja ne otkaže pisanim putem u roku od 30 (trideset) dana računajući od dana prijema obavještenja o izvršenim izmjenama Uslova osiguranja odnosno Tarife premija, ugovor o osiguranju (polisa) usklađuje se sa izvršenim izmjenama Uslova osiguranja odnosno Tarife

premija sa danom početka narednog perioda trajanja osiguranja.

- (3) Ako ugovarač osiguranja pisanim putem odbije da prihvati usklađivanje zaključenog ugovora o osiguranju sa izvršenim izmjenama Uslova odnosno Tarife premija, ugovor o osiguranju (polisa) prestaje sa istekom tekuće godine osiguranja.
- (4) Kod ugovora o osiguranju koji su zaključeni sa određenim rokom trajanja na period od 1 (jedne) godine ili kraće, primjenjuju se oni uslovi koji su bili na snazi na dan zaključenja ugovora o osiguranju.

Sniženje (bonifikacija) i povećanje (malus) premije Član 12.

- (1) U nekim vrstama osiguranja i pod uslovima utvrđenim određenim odgovarajućim aktom ugovarač osiguranja, odnosno osiguranik, stiže pravo na bonifikaciju u vidu sniženja premija za sledeći period osiguranja (bonus).
- (2) U nekim vrstama osiguranja i pod uslovima utvrđenim odgovarajućim aktom, ugovaraču osiguranja, odnosno osiguraniku, povećava se premija za sledeći period osiguranja u vidu doplatka (malus).

Nadležnost u slučaju spora Član 13.

- (1) U slučaju spora između ugovarača osiguranja, osiguranika i osiguravača nadležan je stvarno nadležni sud prema mjestu zaključenja ugovora o osiguranju.

II OBAVEZE OSIGURANIKA, ODNOSNO UGOVARAČA OSIGURANJA I POSLEDICE NJIHOVOG NEIZVRŠENJA

Prijava okolnosti od značaja za ocjenu rizika Član 14.

- (1) Ugovarač osiguranja dužan je da prijavi osiguravaču, prilikom zaključenja ugovora, sve okolnosti koje su značajne za ocjenu rizika koje su mu poznate ili mu nijesu mogle ostati nepoznate.
- (2) Ako je ugovarač osiguranja namjerno učinio netačnu prijavu ili namjerno prećutao neku okolnost takve prirode da osiguravač ne bi

zaključio ugovor da je znao za pravo stanje stvari, osiguravač može zahtijevati poništenje ugovora.

U slučaju poništenja ugovora iz razloga navedenih u prethodnoj alineji, osiguravač zadržava naplaćene premije i ima pravo da zahtijeva isplatu premije za period osiguranja u kome je tražio poništenje ugovora.

Pravo osiguravača da zahtijeva poništenje ugovora o osiguranju prestaje ako, u roku od tri mjeseca od dana saznanja za netačnost prijave ili za prećutkivanje, ne izjavi ugovaraču osiguranja da namjerava da koristi to pravo.

- (3) Ako je ugovarač osiguranja učinio netačnu prijavu ili je propustio da da dužno obavještenje, a to nije učinio namjerno, osiguravač može, po svom izboru, u roku od mjesec dana od dana saznanja za netačnost ili nepotpunost prijave izjaviti da raskida ugovor ili predložiti povećanje premije, srazmjerno većem riziku.

Ugovor u tom slučaju prestaje po isteku 14 dana od kada je osiguravač svoju izjavu o raskidu saopštio ugovaraču osiguranja, a u slučaju osiguravačevog predloga da se premija poveća, raskid nastupa po samom zakonu, ukoliko ugovarač osiguranja ne prihvati predlog u roku od 14 dana od dana kada ga je primio.

U slučaju raskida, osiguravač je dužan da vrati dio premije koji otpada na vrijeme do kraja perioda osiguranja, u roku od šesdeset dana.

Ako se osigurani slučaj dogodio prije nego što je utvrđena netačnost ili nepotpunost prijave ili poslije toga, ali prije raskida ugovora odnosno postizanja sporazuma o povećanju premija, naknada se smanjuje u srazmjeri između stopa plaćenih premija i stopa premije koje bi trebalo platiti prema stvarnom riziku.

- (4) Odredbe prethodnih stavova o posledicama netačne prijave ili prećutkivanja okolnosti od značaja za ocjenu rizika primjenjuju se i u slučajevima osiguranja zaključenih u ime i za račun drugoga, ili u korist trećeg, odnosno za tuđ račun, ili za račun koga se tiče – ako su ova lica znala za netačnost prijave ili prećutkivanje okolnosti od značaja za ocjenu rizika.

- (5) Osiguravač kome su u času zaključenja ugovora bile poznate ili nijesu mogle ostati nepoznate okolnosti koje su od značaja za ocjenu rizika, a koje je ugovarač osiguranja netačno prijavio ili prećutao, ne može se pozivati na netačnost prijave ili prećutkivanja. Isto važi kada je osiguravač saznao za te okolnosti za vrijeme

trajanja osiguranja, a nije se koristio zakonskim ovlašćenjima.

Plaćanje premije

Član 15.

- (1) Ugovarač osiguranja dužan je da plati premiju osiguranja, ali je osiguravač dužan da primi uplatu premije od svakog lica koje ima pravni interes da ona bude plaćena.
- (2) Premija se plaća prilikom zaključenja ugovora, po pravilu odjednom, a može se plaćati u ugovorenim rokovima.
- (3) Na iznos premije koji se plaća u ugovorenim rokovima, ugovarač ima pravo naplate kamate na dužnu premiju..
- (4) Ako ugovarač osiguranja ne plati premiju u ugovorenom roku, osiguravač može da obračuna i zateznu kamatu.
- (5) Smatra se da je ukupna premija ili njen dio plaćen onog dana kada je iznos uplate na ime ukupne premije ili njenog dijela uplaćen na račun osiguravača.

Obavještenje osiguravača o promjenama (opasnosti) rizika

Član 16.

- (1) Ugovarač osiguranja dužan je da obavijesti osiguravača o svakoj promjeni okolnosti koja može biti od značaja za ocjenu rizika.
Ugovarač, odnosno osiguranik, dužan je da bez odlaganja obavijesti osiguravača o povećanju rizika, ako je rizik povećan nekim njegovim postupkom, a ako se povećanje rizika dogodilo bez njegovog učešća, dužan je da ga obavijesti u roku od četrnaest dana od dana od kad je to saznao.
Ako je povećanje rizika toliko da osiguravač ne bi zaključio ugovor da je takvo stanje postojalo u času njegovog zaključenja, on može raskinuti ugovor.
Ali, ako je povećanje rizika toliko da bi osiguravač zaključio ugovor samo uz veću premiju da je takvo stanje postojalo u času zaključenja ugovora, on može ugovaraču osiguranja predložiti novu stopu premije.
Ako ugovarač osiguranja ne pristane na novu stopu premije u roku od četrnaest dana od prijema prijedloga nove stope, ugovor prestaje po samom zakonu.

Ali, ugovor ostaje na snazi i osiguravač se više ne može koristiti ovlašćenjima da predloži ugovaraču osiguranja novu stopu premije ili da raskine ugovor, ako ne iskoristi ta ovlašćenja u roku od mjesec dana od kad je na bilo koji način saznao za povećanje rizika ili ako još prije isteka tog roka na neki drugi način pokaže da pristaje na produženje ugovora (ako primi premiju, isplati naknadu za osigurani slučaj koji se desio poslije tog povećanja i sl.).

- (2) Ako se osigurani slučaj dogodio prije nego što je osiguravač obaviješten o povećanju rizika ili pošto je obaviješten o povećanju rizika, ali prije nego što je raskinuo ugovor ili postigao sporazum sa ugovaračem osiguranja o povećanju premija, naknada se smanjuje u srazmjeri između plaćenih premija i premije koju bi trebalo platiti prema povećanom riziku.
- (3) U slučaju kada se poslije zaključenja ugovora o osiguranju dogodilo smanjenje rizika, ugovarač osiguranja ima pravo da zahtijeva odgovarajuće smanjenje premije računajući od dana kada je osiguravača obavijestio o smanjenju.
Ako osiguravač ne pristane na smanjenje premije, ugovarač osiguranja može raskinuti ugovor.

Obaveze sprječavanja osiguranog slučaja i spašavanja, kao i pridržavanje odredaba o zaštitnim mjerama

Član 17.

- (1) Osiguranik je dužan da preduzme propisane, ugovorene i sve ostale mjere potrebne da se spriječi nastupanje osiguranog slučaja, a ukoliko osigurani slučaj nastupi, dužan je da preduzme sve što je u njegovoj moći da se ograniče štetne posledice.
- (2) Osiguravač je dužan da naknadi troškove, gubitke kao i druge štete prouzrokovane razumnim pokušajem da se otkloni neposredna opasnost nastupanja osiguranog slučaja, kao i pokušajem da se ograniče njegove štetne posledice, pa i kad su ti pokušaji ostali bez uspjeha.
- (3) Osiguravač je dužan dati ovu naknadu čak i ako ona zajedno sa naknadom štete od osiguranog slučaja prelazi sumu osiguranja.
- (4) Ako osiguranik ne ispuni svoju obavezu sprječavanja osiguranog slučaja ili obavezu spašavanja, a za to nema opravdanja, obaveza osiguravača se smanjuje za onoliko koliko je nastala veća šteta zbog tog neispunjenja.

- (5) Ako je određen ili ugovoren rok do koga treba sprovesti mjere za sprečavanje ostvarenja ili povećanja opasnosti (preventivne mjere), osiguraniku se isplaćuje naknada i kad je osigurani slučaj nastao do isteka tog roka i ako je šteta u uzročnoj vezi sa propisanim, odnosno ugovorenim obavezama.
- (6) U slučaju kada nijesu ugovorene mjere za sprečavanje ostvarenja ili povećanja opasnosti (preventivne mjere), a u toku trajanja osiguranja dođe do ponavljanja osiguranog slučaja na istom mjestu osiguranja (lokaciji), nakon drugog osiguranog slučaja, osiguravač će imati pravo da od osiguranika zahtjeva sprovođenje ovakvih mjera. Ukoliko osiguranik ne sprovede preventivne mjere na način i u roku koji se zahtjeva, osiguravač neće biti u obavezi da isplati štetu prouzrokovanu tom vrstom osiguranog slučaja.

Obaveze osiguranika kad nastane osigurani slučaj

Član 18.

- (1) Kad nastane osigurani slučaj na osnovu koga se traži naknada iz osiguranja, osiguranik je obavezan da postupi na sledeći način:
- 1) odmah preduzme sve mjere koje su u njegovoj moći da se ograniče štetne posledice i da se pri tome pridržava uputstava koje mu je dao osiguravač ili njegov zastupnik;
 - 2) obavijesti osiguravača o nastupanju osiguranog slučaja odmah po saznanju, a najkasnije u roku od tri dana od kada je to saznao;
 - 3) da što prije, a najdalje u roku od tri dana pisanim putem potvrdi prijavu učinjenu usmeno, telefonom, telegramom ili na neki drugi način;
 - 4) u svim slučajevima predviđenim propisima, a naročito kada je šteta prouzrokovana od požara, eksplozije, provalne krađe, razbojništva, razbojničke krađe i saobraćajne nezgode - osiguranik je u obavezi da događaj odmah prijavi nadležnom organu unutrašnjih poslova i navede koje su sve stvari uništene ili oštećene, odnosno nestale prilikom osiguranog slučaja;
 - 5) odmah po nastanku osiguranog slučaja, ako je to moguće, odnosno kad to prilike dozvoljavaju, da podnese osiguravaču popis

uništenih, odnosno oštećenih stvari, uz približnu naznaku njihove vrijednosti;

- 6) do dolaska predstavnika osiguravača na mjesto osiguranog slučaja, potrebno je da osiguranik ne promijeni stanje oštećenih, odnosno uništenih stvari, osim ako je promjena u javnom interesu ili interesu smanjenja, odnosno u cilju nastavljanja normalne proizvodnje.
- Ako se promjena izvrši sa ciljem da se normalna proizvodnja nastavi, osiguranik je dužan da o tome odmah obavijesti osiguravača: telefonom ili na neki drugi način.
- (2) Ugovarač osiguranja je dužan da nezavisno od roka u kome je podnio prijavu štete, predstavniku osiguravača pruži sve podatke i druge potrebne dokaze za utvrđivanje uzroka, obima i visine štete.
- Osiguravač može zahtijevati da osiguranik pribavi i druge dokaze, ako je to potrebno i opravdano.
- (3) Ako osiguranik ne izvrši svoju obavezu obavještanja osiguravača iz stava (1) tačke 2. ovog člana u određeno vrijeme, dužan je nadoknaditi osiguravaču štetu koju bi ovaj zbog toga imao.

III OBAVEZE OSIGURAVAČA

Visina naknade iz osiguranja

Član 19.

- (1) Osiguravač je obavezan da isplati naknadu iz osiguranja za štetu prouzrokovanu nastankom osiguranog slučaja po odedbama ovih Opštih uslova, kao i posebnih uslova za onu vrstu osiguranja po kojoj je zaključen ugovor o osiguranju.
- (2) Osiguravač će umanjiti iznos naknade iz osiguranja za isplatu po određenoj polisi osiguranja za iznos dospjele, a neplaćene premije po toj polisi osiguranja.

Ugovoreni samopridržaj (franšiza)

Član 20.

- (1) Ako je ugovoreno da osiguranik sam snosi jedan dio štete (ugovoreni samopridržaj, franšiza) naknada će se, ako nastupi osigurani slučaj, utvrditi tako da na osiguranika otpada dio štete u visini ugovorenog samopridržaja.

Utvrđivanje, procjena i vještačenje štete

Član 21.

- (1) Kad primi prijavu o nastalom osiguranom slučaju, osiguravač je dužan da odmah, a najkasnije u roku od tri dana, pristupi utvrđivanju i procjeni štete, a ukoliko to ne učini, osiguranik može početi s otklanjanjem štete, uz uslov da se prethodno komisijски utvrdi uzrok nastanka osiguranog slučaja i obim oštećenja. Osiguranik može i prije isteka roka od tri dana da počne da otklanja štetu, ako je to potrebno radi nastavljanja normalne proizvodnje.
- (2) Ako je ugovorom o osiguranju vrijednost osigurane stvari sporazumno utvrđena, naknada se određuje prema toj vrijednosti, izuzev ako osiguravač dokaže da je ugovorena vrijednost znatno veća od stvarne vrijednosti, a za tu razliku ne postoji opravdan razlog (kao npr. osiguranje upotrijebljenije stvari na vrijednost takve nove stvari ili osiguranje subjektivne vrijednosti).
- (3) U slučaju da se osiguranik ne složi sa utvrđenim uzrokom i procjenom štete, može se zatražiti da se utvrđivanje štete izvrši putem vještaka.
- (4) Svaka ugovorna strana pisanim putem imenuje svog vještaka. Za vještaka se mogu imenovati lica koja nijesu u radnom odnosu sa osiguravačem, odnosno osiguranikom. Prije početka vještačenja, oba imenovana vještaka biraju trećeg vještaka kao predsjednika.
- (5) Ako nalazi vještaka međusobno odstupaju, osiguravač će njihove pisane nalaze odmah predati trećem vještaku, koji svoje stručno mišljenje daje samo u granicama konstatacija dvaju vještaka.
- (6) Konstatacije vještaka su obavezujuće za obje strane.
- (7) Predmet vještačenja mogu biti samo sporne činjenice. Koje sporne činjenice će biti predmet vještačenja, kao i postupak vještačenja, određuju se u svakom pojedinačnom slučaju osiguranik i osiguravač – pisanim sporazumom o vještačenju.
- (8) Svaka ugovorna strana snosi troškove za svog vještaka. Troškove za predsjednika snose obje strane po pola.
- (9) Iznos naknade ne može biti veći od štete koju je osiguranik pretrpio nastupanjem osiguranog slučaja.

Prigovor osiguranika

Član 21a.

- (1) Osiguranik koji smatra da su mu odlukom osiguravača po odštetnom zahtjevu narušena prava iz ugovora o osiguranju, može podnijeti prigovor Komisiji za prigovore osiguravača, u roku od osam dana od dana prijema odluke osiguravača.
- (2) Komisija za prigovore osiguravača dužna je da u roku od 30 dana od dana prijema prigovora osiguranika, donese odluku o prigovoru i o odluci obavijesti osiguranika.

Spašeni djelovi

Član 22.

- (1) Ako nije drugačije ugovoreno, spašeni djelovi uništenih, odnosno oštećenih stvari ostaju osiguraniku. Osiguranik nema pravo da poslije nastupanja osiguranog slučaja prepusti osiguravaču uništenu, odnosno oštećenu osiguranu stvar i da od njega zahtijeva isplatu pune sume osiguranja, odnosno pune vrijednosti.
- (2) Vrijednost spašenih uništenih, odnosno oštećenih stvari i/ili njihovih djelova obračunava se po tržišnoj vrijednosti u mjestu štete prema stanju na dan nastanka osiguranog slučaja.

Isplata naknade iz osiguranja

Član 23.

- (1) Kad se dogodi osigurani slučaj, osiguravač je dužan da isplati naknadu u ugovorenom roku koji ne može biti duži od četrnaest dana, računajući od dana kada je osiguravač dobio obavještenje da se osigurani slučaj dogodio. Ako je za utvrđivanje postojanja osiguravačeve obaveze ili njenog iznosa potrebno izvjesno vrijeme, ovaj rok počinje da teče od dana kada je utvrđeno postojanje njegove obaveze i njen iznos.
- (2) Ako iznos osiguravačeve obaveze ne bude utvrđen u roku određenom u prvom stavu ovog člana, osiguravač je dužan da na zahtjev ovlašćenog lica isplati iznos nespornog djela svoje obaveze na ime predujma.
- (3) Isplata naknade nosiocima zaloga i drugih prava:
 - 1) Poslije nastupanja osiguranog slučaja, založna prava i ostala prava koja su ranije postojala na osiguranju stvari imaju za predmet dugovanu naknadu, kako u slučaju

osiguranja sopstvene stvari, tako i u slučaju osiguranja tuđih stvari zbog obaveza njihovog čuvanja i vraćanja, pa osiguravač ne može isplatiti naknadu osiguraniku bez saglasnosti nosioca tih prava.

- 2) Ova lica mogu zahtijevati neposredno od osiguravača da im, u granicama sume osiguranja, i prema zakonskom redu, isplati njihova potraživanja.
- 3) Međutim, ako u času isplate osiguravač nije znao niti je mogao znati za ta prava, izvršena isplata naknade osiguraniku ostaje punovažna.

Vraćanje premije

Član 24.

- (1) Ako osigurana stvar bude uništena prije početka obaveze osiguravača, ugovaraču osiguranja se vraća iznos naplaćene premije.
Ako osigurana stvar bude uništena poslije početka obaveze osiguravača, od rizika koji nijesu obuhvaćeni osiguranjem, ugovaraču osiguranja se vraća iznos premije za neiskorišćeno vrijeme trajanja osiguranja.
- (2) Ako osigurana stvar bude uništena poslije početka obaveze osiguravača od rizika obuhvaćenih osiguranjem, osiguravaču pripada cijeli iznos premije za tekuću godinu osiguranja, odnosno za ugovoreni period osiguranja.
- (3) Prestankom ugovora o osiguranju u svim drugim slučajevima prije isteka vremena za koje je premija plaćena, premija pripada osiguravaču samo do završetka dana do koga je on bio u obavezi, ako drugačije nije ugovoreno.

IV TRAJANJE OSIGURANJA

Početak dejstva osiguranja

Član 25.

- (1) Ugovor o osiguranju, ako se drugačije ne ugovori, svoje dejstvo proizvodi po isteku dvadeset četvrtog časa, dana koji je u polisi označen kao dan početka trajanja osiguranja, pa sve do završetka poslednjeg dana, roka za koji je osiguranje ugovoreno.
- (2) Ako rok trajanja osiguranja nije određen ugovorom, svaka strana može raskinuti ugovor s danom dospelosti premije, obavještavajući

pisanim putem drugu stranu najkasnije tri mjeseca prije isteka tekuće godine osiguranja. U tom slučaju ugovor o osiguranju prestaje istekom dvadeset četvrtog časa, poslednjeg dana tekuće godine osiguranja.

- (3) Ako je osiguranje zaključeno na duži rok od pet godina svaka strana može, po protoku ovog roka, uz otkazni rok od šest mjeseci, pisanim putem izjaviti drugoj strani da raskida ugovor.
- (4) Ugovorom se ne može isključiti pravo svake strane da raskine ugovor, kako je naprijed izloženo.
- (5) Ako ugovarač osiguranja raskine ugovor koji je zaključen na rok duži od pet godina dužan je da plati razliku premije u visini popusta odobrenog po osnovu višegodišnjeg roka trajanja osiguranja.
- (6) Ukoliko je ugovor o osiguranju zaključen uplatom premije osiguranja na osnovu pisane ponude osiguravača iz člana 1. stav (4), ugovor o osiguranju proizvodi svoje pravno dejstvo od dana (časa i minuta) koji je na pisanoj ponudi naveden kao početak osiguranja, pa sve do dana (časa i minuta) koji je na pisanoj ponudi naveden kao istek osiguranja, pod uslovom da su zadovoljene sve odredbe o zaključenju ugovora o osiguranju iz člana 1. stav (4) ovih Uslova.
- (7) Ukoliko je ugovor o osiguranju zaključen uplatom ukupno obračunate premije osiguranja po polisi ili listu pokrića, u skladu sa članom 1. stav (5), ugovor o osiguranju proizvodi svoje pravno dejstvo od dana (časa i minuta) koji je na polisi ili listu pokrića naveden kao početak osiguranja, pa sve do dana (časa i minuta) koji je na polisi ili listu pokrića naveden kao istek osiguranja, pod uslovom da su zadovoljene sve odredbe o zaključenju ugovora o osiguranju iz člana 1. stav (5) ovih Uslova.

Početak i prestanak obaveze osiguravača

Član 26.

- (1) Obaveza osiguravača iz osiguranja počinje, ukoliko se drugačije ne ugovori, po isteku dvadeset četvrtog časa, dana koji je u polisi označen kao početak osiguranja, ukoliko je do tog dana plaćena premija, a inače - po isteku dvadeset četvrtog časa, dana uplate premije.
- (2) Ako je ugovoreno da se premija plaća poslije zaključenja ugovora, obaveza osiguravača da isplati naknadu iz osiguranja počinje od dana određenog u ugovoru kao dan početka osiguranja.

- (3) Može se ugovoriti da obaveza osiguravača počinje od trenutka zaključenja ugovora o osiguranju.
- (4) Međutim, ako ugovarač osiguranja premiju koja je dospjela poslije zaključenja ugovora ne plati do dospelosti, niti to učini neko drugo zainteresovano lice - ugovor o osiguranju prestaje po samom zakonu, po isteku trideset dana od dana kad je ugovaraču osiguranja uručeno osiguravačevo preporučeno pismo s obavještenjem o dospelosti premije. Pri tom navedeni rok ne može isteći prije nego što protekne trideset dana od dospelosti premije.
- (5) U svakom slučaju, ugovor o osiguranju prestaje po samom zakonu, ako premija ne bude plaćena u roku od godinu dana do dana dospelosti.
- (6) Obaveza osiguravača prestaje:
 - 1) Kod ugovora o osiguranju s određenim rokom trajanja – istekom dvadeset četvrtog časa, dana koji je u polisi označen kao dan isteka osiguranja, ukoliko nije drugačije ugovoreno.
 - 2) Kod ugovora o osiguranju, s neodređenim rokom trajanja, ako je u polisi označen samo početak osiguranja, osiguranje se uz primjenu stava (4) i (5) ovog člana produžava iz godine u godinu, osim ako neka od ugovornih strana najkasnije tri mjeseca prije dana dospelosti premije pisanim putem obavijesti drugu stranu da ne želi da produži ugovor o osiguranju. U tom slučaju, ugovor o osiguranju prestaje istekom dvadeset četvrtog časa posljednjeg dana tekuće godine osiguranja.

V ŠTETA I OSIGURANI RIZICI

Štete pokrivenne osiguranjem

Član 27.

- (1) Osiguravač je dužan da naknadi štete nastale slučajno ili krivicom ugovarača osiguranja, osiguranika ili korisnika osiguranja, izuzev ako je u pogledu određene štete ova njegova obaveza izričito isključena ugovorom o osiguranju.

Štete koje nijesu pokrivenne osiguranjem

Član 28.

- (1) Osiguravač nije u obavezi da isplati naknadu za štetu, prouzrokovanu:

- 1) Ratnim operacijama ili pobunama, osim ako je drugačije ugovoreno, ratom, invazijom, dejstvom stranog neprijatelja, neprijateljstvima ili sličnim operacijama (bez obzira da li je rat objavljen ili ne), građanskim ratom, pobunom, revolucijom, ustankom, kao i nemirima koji nastanu iz takvih događaja, minama, torpedima, bombama ili drugim eksplozivnim sredstvima, zaplenom, oduzimanjem, ograničenjem ili zadržavanjem i posledicama tih događaja ili pokušajima da se izvrše, konfiskacijom, rekvizicijom ili ostalim sličnim mjerama koje sprovodi, odnosno namjerava da sprovede vlast ili neka politička organizacija koja se bori za vlast, odnosno koja ima vlast, sabotажom ili terorizmom, izvršenim od lica koja djeluju iz političkih pobuda u ime ili u vezi sa bilo kakvom organizacijom ili od lica koje, odnosno koja djeluju iz političkih pobuda, nezavisno od bilo kakve organizacije. Osiguravač je dužan da dokaže da je šteta prouzrokovana nekim od ovih događaja.
- 2) Namjerno ili prevarom ugovarača osiguranja, osiguranika ili korisnika osiguranja. Ali, ako se ostvario osigurani slučaj osiguravač je dužan da naknadi svaku štetu prouzrokovanu od nekog lica za čije je postupke osiguranik odgovara po bilo kom osnovu, bez obzira na to da li je šteta prouzrokovana nepažnjom ili namjerno.

VI NADOSIGURANJE I UGOVOR SA VIŠE OSIGURAVAČA

Nadosiguranje

Član 29.

- (1) Ako se pri zaključenju ugovora jedna strana posluži prevarom i tako ugovori sumu osiguranja veću od stvarne vrijednosti osigurane stvari, druga strana može tražiti poništenje ugovora.
- (2) Ako je ugovorena suma osiguranja veća od vrijednosti osiguranih stvari, a pri tome ni jedna strana nije postupila nesavjesno, ugovor ostaje na snazi, suma osiguranja se snižava do iznosa stvarne vrijednosti osiguranih stvari, dok se premija srazmjerno smanjuje.

- (3) U oba slučaja, savjesni osiguravač zadržava primljene premije i ima pravo na nesmanjenu premiju za tekući period.

Višestruko i dvostruko osiguranje

Član 30.

- (1) Ako je stvar osigurana kod dva ili više osiguravača od istog rizika za isti interes i za isto vrijeme, tako da zbir suma osiguranja ne prelazi vrijednost te stvari (višestruko osiguranje), svaki osiguravač u potpunosti odgovara za izvršenje obaveza nastalih iz ugovora koji je on zaključio.
- (2) Ako, pak, zbir suma osiguranja prelazi vrijednost osiguranih stvari (dvostruko osiguranje), a pri tom ugovarač osiguranja nije postupio nesavjesno, sva ta osiguranja su punovažna i svaki osiguravač ima pravo na ugovorenu premiju za period osiguranja u toku, a osiguranik ima pravo da zahtijeva od svakog pojedinačnog osiguravača naknadu prema ugovoru zaključenom sa njim, ali ukupno ne više od iznosa štete.
- (3) Kad se dogodi osigurani slučaj, ugovarač osiguranja dužan je da o tome obavijesti svakog osiguravača istog rizika i saopšti mu imena i adrese ostalih osiguravača, kao i sume osiguranja pojedinih ugovora koji su sa njima zaključeni.
- (4) Po isplati naknade osiguraniku, svaki osiguravač snosi dio naknade u srazmjeri u kojoj stoji suma osiguranja na koju se on obavezao prema ukupnom zbiru suma osiguranja, pa osiguravač koji je platio veći iznos ima pravo da zahtijeva od ostalih osiguravača naknadu više plaćenog iznosa.
- (5) Ako je ugovor zaključen bez naznačenja sume osiguranja ili uz neograničeno pokriće, smatra se da je ugovor zaključen uz najvišu sumu osiguranja.
- (6) Za osiguravačev dio koji on ne može da plati, odgovaraju ostali osiguravači, srazmjerno svojim djelovima.
- (7) Ako je ugovarač osiguranja zaključio ugovor o osiguranju kojim je nastalo dvostruko osiguranje, on može, bez obzira na to da li je ranije osiguranje zaključio on ili neko drugi, u roku od mjesec dana, od kad je saznao za to osiguranje, zahtijevati odgovarajuće sniženje sume osiguranja i premije docnijeg osiguranja, ali osiguravač pritom

zadržava primljene premije i ima pravo na premiju za tekući period.

- (8) Ako je do dvostrukog osiguranja došlo zbog smanjenja vrijednosti osiguranih stvari za vrijeme trajanja osiguranja, ugovarač osiguranja ima pravo na odgovarajuća sniženja suma osiguranja i premije, počev od dana kad je osiguravaču saopštio ovaj zahtjev za sniženje.
- (9) Ako je pri nastanku dvostrukog osiguranja ugovarač osiguranja postupio nesavjesno, svaki osiguravač može da traži poništenje ugovora, zadrži primljene premije i zahtijeva nesmanjenu premiju za tekući period.

VII PODOSIGURANJE

Član 31.

- (1) Kad se utvrdi da je u početku određenog perioda osiguranja vrijednost osigurane stvari bila veća od sume osiguranja, iznos naknade koju osiguravač duguje srazmjerno se smanjuje, izuzev ako je drugačije ugovoreno.
- (2) Osiguravač je dužan da izvrši potpunu naknadu sve do iznosa sume osiguranja, ako je ugovoreno da odnos između vrijednosti stvari i sume osiguranja nema značaja za određivanje iznosa naknade.

VIII PRELAZ UGOVORA NA PRIBAVIOCA OSIGURANE STVARI

Član 32.

- (1) U slučaju otuđenja osigurane stvari, kao i stvari u vezi sa čijom je upotrebom zaključeno osiguranje od odgovornosti, prava i obaveze ugovarača osiguranja prelaze na pribavioca, osim ako nije drugačije ugovoreno.
- (2) Ali ako je otuđen samo jedan dio osiguranih stvari koje u pogledu osiguranja ne čine zasebnu cjelinu, ugovor o osiguranju prestaje u pogledu otuđenih stvari.
- (3) U slučaju kad se zbog otuđenja stvari poveća ili smanji vjerovatnoća nastupanja osiguranog slučaja primjenjuju se opšte odredbe o povećanju ili smanjenju rizika.
- (4) Ugovarač osiguranja koji ne obavijesti osiguravača da je osigurana stvar otuđena,

ostaje u obavezi da plaća premije koje dospijevaju i poslije dana otuđenja.

- (5) Osiguravač i pribavilac osigurane stvari mogu odustati od osiguranja uz otkazni rok od petnaest dana, s tim što su dužni da podnesu otkaz najdalje u roku od trideset dana od saznanja za otuđenje.

Ako se ugovor u smislu prethodne alineje otkáže, ugovor o osiguranju prestaje istekom dvadeset četvrtog časa, dana kad ističe otkazni rok. Ako se otkaz šalje preporučeno poštom, kao dan otkaza smatra se dan predaje pošti.

- (6) Ugovor o osiguranju ne može se raskinuti ako je polisa osiguranja izdata na donosioca ili po naredbi.

IX PRELAZ OSIGURANIKOVIH PRAVA PREMA ODGOVORNOM LICU NA OSIGURAVAČA (SUBROGACIJA)

Član 33.

- (1) Isplatom naknade iz osiguranja prelaze na osiguravača, po samom zakonu, do visine isplaćene naknade, sva osiguranikova prava prema licu koje je po bilo kom osnovu odgovorno za štetu.
- (2) Ako je krivicom osiguranika onemogućen prelaz prava na osiguravača, u potpunosti ili djelimično, osiguravač se u odgovarajućoj mjeri oslobađa svoje obaveze prema osiguraniku.
- (3) Prelaz prava sa osiguranika na osiguravača ne može biti na štetu osiguranika, pa ako je naknada koju je osiguranik dobio od osiguravača, iz bilo kog uzroka niža od štete koju je pretrpio, osiguranik ima pravo da mu se iz sredstava odgovornog lica isplati ostatak naknade prije isplate osiguravačevog potraživanja po osnovu prava koja su prešla na njega.
- (4) Izuzetno od pravila o prelazu osiguranikovih prava na osiguravača, ova prava ne prelaze na osiguravača ako je štetu prouzrokovalo lice u srodstvu u prvoj liniji sa osiguranikom ili lice za čije postupke osiguranik odgovara ili koje živi sa njim u istom domaćinstvu, odnosno lice koje je radnik osiguranika, osim ako su ta lica štetu prouzrokovala namjerno.
- (5) Ali ako je neko od lica pomenutih u prethodnom stavu bilo osigurano od odgovornosti, osiguravač

može zahtijevati od njegovog osiguravača naknadu iznosa koji je isplatio osiguraniku.

X ZASTARJELOST POTRAŽIVANJA

Član 34.

- (1) Zastarjelost potraživanja iz ugovora o osiguranju imovine regulisana je odgovarajućim odredbama Zakona o obligacionim odnosima.

XI PRIMJENA OVIH USLOVA

Član 35.

- (1) Ovi Uslovi primjenjuju se na osiguranje imovine, osim na vrste osiguranja koje imaju opšte uslove. Na ugovor o osiguranju imovine primjenjuju se i ostale kogentne odredbe Zakona o obligacionim odnosima (Glava XXVII – osiguranje), dok se dispozitivne odredbe primjenjuju ukoliko pojedina pitanja na koja se odnose nijesu drugačije regulisana ovim Uslovima.
- (2) Ako su odnosi koji se regulišu odredbama ovih uslova drugačije regulisani za pojedine vrste osiguranja, primijenit će se odredbe posebnih uslova osiguranja za pojedine vrste osiguranja imovine.
- (3) Ovi Uslovi stupaju na snagu i primjenjuju se od 01.06.2021. godine.